



1



2



3

ԱՂ. Ա

### ՆԱԽԻՋԵԻԱՆԻ ԲԱՐԲԱՌԱՅԻՆ ՔԱՐՏԷԶԸ

Արտակ Վարդանեան

1921 թուականի մարտի 16-ի Կարսի տխրահռչակ դաշնագրով Խորհրդային Ադրբեջանին բռնակցուելուց յետոյ բնիկ հայկական Նախիջեանի տարածքում Ադրբեջանի վարած յայտնի հակահայ քաղաքականութեամբ պետական մակարդակով ոչ միայն կազմակերպուեց բնիկ հայ բնակչութեան ճերմակ ցեղասպանութիւնը, մշակոյթի համաշխարհային գանձարանի մասը կազմող բազմաթիւ հայկական յուշարձանների ոչնչացումը, այլև իրենց իսկ բնօրրանում մարեցին ամբողջ շարք տոհմիկ հայ բարբառներ:

Նախիջեանի տարածքն ընդգրկում է պատմական Հայաստանի Վասպուրական աշխարհի Գողթն եւ Նախճաւան, Այրարատ աշխարհի Շարուր, Սիւնիք աշխարհի Ճահուկ-Շահապուռնիք եւ Երնջակ գաւառները: Պատմական տարբեր նահանգների, հետեւաբար եւ ազգազրական տարբեր շրջանների խաչմերուկ լինելու հանգամանքը, ինչպէս նաեւ բնակչութեան զանգուածային տեղաշարժերը նպաստել են Նախիջեանի տարածքի բարբառային բազմազանութեանը:

20-րդ դարի սկզբին Նախիջեանի տարածքն ընդգրկում էր մօտ եօթ տասնեակ հայաբնակ բնակավայր, որոնց գերակշռող մասը (38 բնակավայր) խօսում էր Խոյի բարբառի խօսուածքներով (1828 թուականի Թուրքմենչայի պայմանագրով Խոյ-Սալմաստից ներգաղթածները), քանի որ 1604-1605 թուականների շահաբասան յայտնի բռնագաղթից յետոյ Նախիջեանի բնիկ հայ բնակավայրերի մեծագոյն մասն ամայացել էր: Չնայած պատմական հանգամանքների բերումով տարածքում տեղի ունեցած մեծ տեղաշարժե-

րին՝ այնտեղ պահպանուել էին նաեւ բնիկ խօսուածքներ՝ Ագուլիսի բարբառը (Ագուլիս քաղաք, շրջակայ գիւղեր), Ջուղայի բարբառը (Հին Ջուղայի տարածքում գտնուող Ջուղա գիւղը), Աստապատի ենթաբարբառը (Աստապատ, Կարմիր վանք գիւղեր), Վայոց ձորի խօսուածքը (Նախճաւան գաւառի Ազնաբերդ եւ Ճահուկ-Շահապուռնիք գաւառի Օծոփ գիւղեր), Արցախի եւ Մեղրու բարբառների խօսուածքները (համապատասխանաբար Երնջակ եւ Գողթն գաւառների հիւսիսային գիւղեր): Բնակչութեան ներքին տեղաշարժերի հետեւանքով առաջացել էին նաեւ միջխօսուածքներ՝ Նախիջեան-Այլապատի (Խոյի եւ Արարատեան բարբառներ), Ջուլֆայի (Ջուղայի եւ Խոյի), Որդուարի (Ագուլիսի եւ Խոյի) եւ այլն:

Նախիջեանի բարբառային քարտէզը պատմական վճռորոշ իրադարձութիւնների հետեւանքով (օրինակ, 1604 թ., 1828 թ.) կրել է համապատասխան փոփոխութիւններ: 20-րդ դարում կարելի է առանձնացնել հետեւեալ հիմնական ժամանակագրական փուլերը՝

ա) 1918-1920 թուականների իրադարձութիւնների նախօրեակ, երբ հայ բնակչութիւնը կազմում էր տարածքի բնակչութեան մօտ 50 տոկոսը (մեծամասնութիւնը):

բ) 1924 թուականի՝ Նախիջեանի ԻԽՍՀ կազմաւորման նախօրեակ, երբ հայ բնակչութիւնը կազմում էր տարածքի բնակչութեան մօտ 20 տոկոսը:

գ) 1988 թուականի՝ Նախիջեանի վերջնական հայաթափման նախօրեակ, երբ հայ բնակչութիւնը կազմում էր տարածքի բնակչութեան մօտ 20 տոկոսը:

րածքի բնակչության ընդամենը 2 տոկոսը:

Անցեալ դարասկզբի Նախիջևանի հայ բնակչության մասին առկայ վիճակագրական-տեղագրական տուեալները<sup>1</sup> եւ տարածքում առկայ խօսուածքների մասին մեր ունեցած տեղեկութիւնների հիման վրայ ստորեւ ներկայացնում ենք տարածքի՝ հայ բնակչութիւն ունեցող բնակավայրերը՝ ըստ գաւառների, եւ յիշեալ երեք ժամանակագրական փուլերում դրանցում առկայ խօսուածքները:

**ԳՈՂԹՆ ԳԱԻԱՌ**  
(16 բնակավայր)

ՈՐԴՈՒԱՐ, Բիստ, Դեր, Դիսար, Համրամէջ, Մեսրոպաւան, Ներքին Ագուլիս, Ներքին Ագա, Ողոհի, Ռամիս, Վերին Ագուլիս, Տանակերտ, Յղնա, Փառակա, Քաղաքիկ, Վերին Ագա

**ՆԱԽՃԱԻԱՆ ԳԱԻԱՌ**  
(20 բնակավայր)

ՆԱԽԻՋԵԻԱՆ, Ազնաբերդ, Ալագեոգ-Մազրա, Ալլապատ, Աստապատ, Դիդուվար, Եմիսանա, Երնջակ, Խալիլու, Կարախանքեկլու, Կարսի վանք, Կուլիբեկ Դիգա, Հաջիվար, Մամարգա Դիգա, Մոխրաբլուր, Նազարապատ, Ծմրթան, Տամբատ, Վերին Ըզնորա, Քեարիմբեկ Դիգա

**ԵՐՆՁԱԿ ԳԱԻԱՌ**  
(10 բնակավայր)

ՋՈՒԼՖԱ, Աբրակունիս, Արագին, Գեաղ, Կզնուտ, Նորաշէն, Ծահկերտ, Ծոռոթ, Ջուղա, Փորադաշտ

**ՃԱՀՈՒԿ-ՇԱՀԱՊՈՒՆԻՔ ԳԱԻԱՌ**  
(10 բնակավայր)

ԾԱՀՈՒԿ, ԾԱՀԱՊՈՒՆՔ, Արինջ, Բաբոնք, Գեոմուր, Խալիսալ, Կժաձոր, Նորս,

Նորս-Մազրա, Օծոփ

**ՇԱՐՈՒՐ ԳԱԻԱՌ**  
(7 բնակավայր)

ՆՈՐԱԾԷՆ, Ալաքլու, Դաշարիս, Թագագիւղ, Խանլուխար, Վարմազեար, Քեշտազ

**ԱԳՈՒԼԻՍԻ ԲԱՐԲԱՌ**  
(8 բնակավայր)

ՈՐԴՈՒԱՐ, Դիսար, Համրամէջ, Ներքին Ագուլիս, Վերին Ագուլիս, Տանակերտ, Յղնա, Քաղաքիկ

**ՋՈՒՂԱՅԻ ԲԱՐԲԱՌ**  
(2 բնակավայր)

ՋՈՒԼՖԱ, Ջուղա

**ԱՐՅԱՄԻ ԲԱՐԲԱՌ**  
(6 բնակավայր)

Աբրակունիս, Գեաղ, Նորաշէն, Ծահկերտ, Ծոռոթ, Փորադաշտ

**ՄԵՂՐՈՒ ԲԱՐԲԱՌ**  
(5 բնակավայր)

Բիստ, Մեսրոպաւան, Ողոհի, Ռամիս, Փառակա

**ԽՈՅԻ ԲԱՐԲԱՌ**  
(38 բնակավայր)

ԾԱՀՈՒԿ, ԾԱՀԱՊՈՒՆՔ, ՆԱԽԻՋԵԻԱՆ, ՆՈՐԱԾԷՆ, Ալագեոգ-Մազրա, Ալաքլու, Ալլապատ, Արագին, Արինջ, Բաբոնք, Գեոմուր, Դաշարիս, Դեր, Դիդուվար, Եմիսանա, Երնջակ, Թագագիւղ, Խալիսալ, Խանլուխար, Խալիլու, Կարախանքեկլու, Կզնուտ, Կժաձոր, Կուլիբեկ Դիգա, Հաջիվար, Մամարգա Դիգա, Մոխրաբլուր, Նազարապատ, Ներքին Ագա, Նորս, Նորս-Մազրա, Ծմրթան, Վարմազեար, Վերին Ագա, Վերին Ըզնորա, Տամբատ, Քեշտազ, Քեարիմբեկ Դիգա

**ԱՍՏԱՊԱՏԻ ԵՆԹԱԲԱՐԲԱՌ**  
(2 բնակավայր)

Աստապատ, Կարսի վանք

**ՎԱՅՈՑ ՉՈՐԻ ԽՕՍՈՒԱԾՔ**  
(2 բնակավայր)

Ազնաբերդ, Օծոփ

Դասական բարբառագիտութեանը քաջածանօթ են Ագուլիսի<sup>2</sup>, Ջուղայի<sup>3</sup>, Արցախի<sup>4</sup>, Մեղրու<sup>5</sup> եւ Խոյի<sup>6</sup> ուսումնասիրուած բարբառները, ինչպէս նաեւ Աստապատի ենթաբարբառը<sup>7</sup>: Համեմատաբար «նորայայտ» բարբառ է Վայոց ձորի խօսուածքը (Վայոց ձորի շուրջ մէկ տասնեակ տեղաբնիկ գիւղեր, հիւսիսային Նախիջևանի այժմ արդէն հայաթափ երկու բնակավայր՝ Նախիջևան գաւառի Ազնաբերդ եւ Ճահուկ-Շահապունիք գաւառի Օծոփ գիւղեր): Մինչեւ 1980-ական թուականները Վայոց ձորի խօսուածքի մասին սոսկ թուցիկ յիշատակութիւններ կային բարբառագիտական գրականութեան մէջ<sup>8</sup>, որտեղ համարուում էր Արարատեան բարբառի խօսուածք: Մեր հեղինակած մի քանի աշխատանքներով<sup>9</sup> պարզել ենք, որ Վայոց ձորի խօսուածքը զուտ Արարատեան բարբառի խօսուածք է: այն իր յատկանիշներով հաւասարապէս տարբերուում է ինչպէս Արարատեան, այնպէս էլ Արցախի եւ Վասպուրականի յարակից խօսուածքներից. փաստ, որ հաստատուում է խօսուածքի տեղաբնիկ լինելը:

Մասնաւորապէս՝ խօսուածքում բառասկզբում ձայնեղ պայթականներն ու կիսաշփականները խլանում են, իսկ բառամիջում եւ բառավերջում խուլները ձայնեղանում են (պադ, տա՛նա՛դ, ծաքար, ճա՛նջ, կադու, արգաթ, պաոց, կաբիդ, կանգադ). մասնակիօրէն գործում է Աճառեանի օրէնքը (տա՛լար, պա՛նջար). բացառական հոլովը անուանական համա-

կարգում կազմուում է էն վերջաւորութեամբ (սարէն, ծօրէն), դերանուանական համակարգում՝ անէ վերջաւորութեամբ (ինձանէ, քէզանէ). պահպանուել է հին հայերէնի օ հոլովումը (մըղանի-մըղանօ, քամի-քամօ). ապառնի դերբայը կազմուում է օ վերջաւորութեամբ (քընալօ, լըսիլօ). բայի ժխտական ձեւերը կազմուում են օժանդակ բայի ետադաս կիրառութեամբ (լսըմ էէմ, լսիլօ էէմ, լսըմ էիմ, բիդի լսիմ վօջ եւ այլն). բայի անցեալի ձեւերի առաջին դէմքում առկայ է մ վերջաւորութիւնը (լսըմ իմ, լսել իմ, լսիմ, կլսիմ, բիդի լսիմ, լսիլ դիմ):

Հետաքրքրական է նաեւ այն փաստը, որ Վայոց ձորի միջնադարեան վիմագիր արձանագրութիւններում<sup>10</sup> եւ ձեռագրերի յիշատակարաններում<sup>11</sup> պահպանուել են խօսուածքի հետքերը. փաստ, որը հաստատուում է խօսուածքի բնիկ լինելը:

Ներկայացուող քարտէզները ժամանակագրական փուլերով ընդհանուր պատկերացում են տալիս ինչպէս տարածքի հայ բնակչության տեղաբաշխման, այնպէս էլ 20-րդ դարի ընթացքում բարբառների տարածման սահմանների մասին: Արձանագրում են նաեւ վերջին տասնամեակներում իրենց իսկ բնօրրանում հայերէնի մի շարք բարբառների ու խօսուածքների ոչնչացման իրողութիւնը, որոնց թւում են յատկապէս բազմաթիւ ուսումնասիրողների ուշադրութիւնը դրաւող Ագուլիսի բարբառը (զօկերէնը), որի վերջին կրողները մինչեւ 1988 թուականի վերջը ապրում էին Յղնա գիւղում, Աստապատի ենթաբարբառը (մարել է 20-րդ դարի կէսերին), Ջուղայի բարբառը (պահպանուել է միայն Սպահանի Նոր Ջուղա թաղամասում), ինչպէս նաեւ Արցախի, Մեղրու, Խոյի բարբառների եւ Վայոց ձորի խօսուածքի տեղական տարբերակները:

ԾԱՆՕԹԱԳՐՈՒԹԻՒՆՆԵՐ

- 1 Ա.Ռ. (Յովհաննէս Տէր-Մարտիրոսեան), Հայ-թուրքական ընդհարումը Կովկասում (1905-1906 թթ.), Երևան, 1907, էջ 64-67:
- 2 Ս. Մարգարեան, Ազուլեցոց բարբառը (զօկերի լեզուն), մաս 1-2, Մոսկուա, 1883: Հր. Աճառեան, Բնութիւն Ազուլիսի բարբառի, Երևան, 1935:
- 3 Հր. Աճառեան, Բնութիւն Նոր Ջուղայի բարբառի, Երևան, 1940:
- 4 Հր. Աճառեան, Բնութիւն Հարաբաղի բարբառի, Վաղարշապատ, 1901:
- 5 Է. Աղայեան, Մեղրու բարբառը, Երևան, 1954:
- 6 Մ. Ասատրեան, Ուրմիայի (Խոյի) բարբառը, Երևան, 1962:
- 7 Հր. Աճառեան, Հայ բարբառագիտութիւն, Մոսկուա, 1911, էջ 37, 45-46: Գ. Զահուկեան,

Հայ բարբառագիտութեան ներածութիւն, Երևան, 1972, էջ 13-156:

- 8 Ա. Ղարիբեան, Հայ բարբառագիտութիւն, Երևան, 1947, էջ 73: Ա. Գրիգորեան, Հայ բարբառագիտութեան դասընթաց, Երևան, 1957, էջ 205:
- 9 Ա. Վարդանեան, Վայոց ձորի խօսուածքի հնչիւնաբանութիւնը, «Բանբեր Երևանի համալսարանի», թիւ 1, 1983, էջ 71-83: Ա. Վարդանեան, Վայոց ձորի խօսուածքի ձեւաբանական առանձնայատկութիւնները (դրոյթներ), «Երիտասարդ լեզուաբանների հանրապետական հինգերորդ գիտաժողովի նիւթեր», Երևան, 1986, էջ 107-108:
- 10 Ղ. Ալիշան, Սիսական, Վեճետիկ, Ս. Ղազար, 1893, էջ 145, 167:
- 11 Ակնարկներ միջին գրական հայերէնի պատմութեան, հատոր Ա, Երևան, 1973, էջ 39-40:

